



16. august 2024

UKA 2024/125

Matumuuna Inatsisartut maleruagassaanni § 33 malillugu isummerfigisassatut una siunnersuutigineqarpoq:

**Pisortat namminersortullu suliffeqarfiini atorfinerlaat 30-it inorlugit ukiullit tamarmik kiisalu atorfinerlaat killilimmik pisinnaasallit tamarmik qaammatini arfinilinni siullerni atorfeqarnerminnut atatillugu siunnersorteqartinneqalissappata/ikorfartorteqartinneqalissappata tamatuma iluaqutissartai ajoqutissartaalu allaaseralugit Naalakkersuisut nassuiaasioqqullugit peqquneqarnissaanik Inatsisartut aalajangiiffigisassaattut siunnersuut. Taamatut aqqissuussisoqarpat tamatuma pisortanut namminersorlutillu inuussutissarsiuteqartunut qanoq akeqarsinnaanerani naatsorsuinernik nassuiaat imaqassaaq.**

(Inatsisartunut ilaasortaq Anna Wangenheim, Demokraatit)

### **Tungavilersuut**

Uagut maani nunatsinni imminut assortornermi inissisimapajaarpugut, inuusuttoqarmat aammalu inuusuttoqarmat innarluutilinnik, suliffeqanngitsunik. Tassungali ilutigalugu takusarlutigu, namminersorlutik inuussutissarsiuteqartut nunanit allanit sulisussarsiortut. Tamanna imminut assortortunut iliornerput ilungersunartutut tigusariaqarparput.

Suliffeqarfinni suliffinnilu sulisut nutaat akuullualernissaannut pikkorippallaarpasinngilagut. Tamanna iliuseqarfigisariaqarparput.

Sullivinni Avatangiisinut Siunnersuisooqatigiit 2023 ukiaani suliniuteqarnissamut pilersaarummik sanasoqarnissaa siunertaralugu seminarertitsivoq. Tassunga atasumik ukkatarineqarput inuusuttunut atorfinerlaanullu sullivimmi atukkat<sup>1</sup>. Isumaqarpunga, pissusissamisoortoq, tassunga atasumik misissoraanni, qanoq ililluni ikorfartortit aqputigalugit inuusuttut atorfinerlaat aammalu atorfinerlaat innarluuteqatut tikilluaqquneqartarnissaat ikorfartorteqartillugit, taamaaliornikkut atorfinerlaat atorfininnerminni toqqisisimaneq misiginiassamassuk ikorfartorteqarlutik, apeqqutinik akisinnaasunik aammalu ikiuillutillu aqputissuussisinnaasunik, atorfinerlaap suliffittaaminik aallartilluarnissaanut.

Inuusuttut inuillu innarluutillit suliffeqarfinni ajornartorsiornerpaakkajupput. Sulinermut ingerlariaatsimut naleqqussarnermut unammilligassaqartarput nutaanik immikkuullarissunillu, misillitagaqaratik sulianullu tunngasuni ajoqusersinnaanermut qanikkajuttarlutik. Ikorfartorteqarneq inuunerissaarnissaannut toqqissisimanissaannullu imminnut akilertussatut iliuseqarneruvoq taamaattumillu pingaaruteqarluinnarluni suliffimmi avatangiisimik peqqinnartumik pinngorartitsisumillu qulakkeerinninnissamut. Isumaga unaavoq, ikorfartortit ittumik pilersitsinerup suliffeqarfinni sulilerlaat amerlanerusut suliinnarnissaannik qulakkeerinnissinnaasoq, tamannalu inummut, suliffeqarfimmut inuiaqatigiinnullu iluaqutaasussaasoq.

---

<sup>1</sup> § 37-mi apeqqutit normu 120-2024-mut akissutit



Taamaattumik isumaqarpunga, nalunaarummik sanasoqassasoq, pitsaaqutit ajoqutaasullu suunersut pillugit, atorfinerlaat 30-vit inorlugit ukiullit tamarmik aammalu inuit innarluuteqartut atorfinerlaat tamarmik namminersortuni pisortallu ingerlataanni aqqutissiuussisumik/ikorfartortilerneqartassasut atorfininnerminni qaammatini arfinilinni siullerni.

Neriuppunga, Naalakkersuisut Inatsisartunilu partiit sinnerisa nalunaarusiornissamik siunnersuut una taparserumaaraat.

**Pisortanut aningaasatigut allaffissornikkullu kingunissai**

Nalunaarusiornermut atasumik aningaasartuuteqartoqassaaq. Taakku atorfilittap ukiumut akissarsiaasa 500.000 koruunit qaangerneqarnissaat naatsorsuutigineqanngilaq.

**Namminersorlutik inuussutissarsiuteqartunut aningaasatigut allaffissornikkullu kingunissai**

Nalunaarusip suliarineqarneranut toqqaannartumik soqanngilaq.

**Innuttaasunut aningaasatigut allaffissornikkullu kingunissai**

Nalunaarusiap suliarineqarneranut toqqaannartumik atasumik soqanngilaq.